

**DAP: Menteri Umno jangan 'bertindak melulu' seperti Perkasa
Malaysian Insider
July 16 , 2013
OLEH MOHD FARHAN DARWIS**

Menteri Umno dinasihatkan tidak mengikut jejak langkah badan bukan kerajaan (NGO) kumpulan pendesak Melayu, Perkasa dalam kenyataan keras membantah kenyataan yang dikeluarkan wakil Vatican, kata DAP Sabah.

Ahli Dewan Undangan Negeri (ADUN) Kepayan, Dr Edwin Bosi menegaskan kenyataan keras yang dikeluarkan oleh menteri-menteri Umno akan mencalarakan imej Malaysia sebagai negara yang mengamalkan kesederhanaan di mata dunia.

"Sehingga hari ini, tiga Menteri Kabinet seperti (Menteri Dalam Negeri Datuk Seri) Jamil Khir (Baharom), (Menteri Luar Datuk Seri) Anifah Aman dan (Menteri Belia dan Sukan) Khairy Jamaluddin mengeluarkan kenyataan keras terhadap Archbishop Joseph Marino, ekoran kenyataannya kepada media.

"Saya mengharapkan, dan menggesa menteri Umno dan ahli politik untuk berhenti mengikut jejak langkah ekstremis seperti Perkasa dan Jati," katanya, yang juga Setiausaha DAP Sabah.

Archbishop Marino sebelum ini mengeluarkan kenyataan pertubuhan Kristian di Malaysia yang menggunakan perkataan "Allah" merujuk kepada Tuhan.

Beliau juga turut dilaporkan menyokong penggunaan kalimah itu walaupun kes itu masih lagi dibicarakan di mahkamah.

Edwin juga menggesa kenyataan-kenyataan ekstremis tidak lagi dikeluarkan kerana ia boleh menggugat "keamanan nasional" dan mengguris hati penganut Kristian Sabah yang sejak sekian lama menggunakan perkataan berkenaan.

"Ia adalah lumrah untuk diplomat Vatican memberikan pendapatnya terhadap isu berkaitan gereja tempatan, ia tidak seharusnya dianggap sebagai mencampuri urusan dalaman Malaysia," kata Edwin, yang juga antara pemimpin terawal dari Sabah mengulas isu berkenaan.

Marino adalah Apostolic Nuncio pertama ke Malaysia, dan menjawat kedudukan berkenaan awal tahun ini.

Isu penggunaan kalimah Allah kembali menjadi perhatian selepas wakil Vatican mengeluarkan kenyataan mengulas berkenaan perkara itu.

Ia kemudiannya menimbulkan reaksi negatif dan bantahan daripada ahli Parlimen Umno yang melihatnya sebagai "mencampuri urusan pentadbiran kerajaan." - 16 Julai, 2013

Hakcipta © 2013 The Malaysian Insider

Source:

<http://www.themalaysianinsider.com/bahasa/article/dap-menteri-umno-jangan-bertindak-melulu-seperti-perkasa>

